

*Libera corporeo MENS carcere GAUDET IN ASTRIS.
PURA PROBATORUM SEDEM SORTITA PIORUM.*

In altero Epigrammate sub altari more Martyrum illius Corpus reconditum scribit :

*Digna pio domus est Altaria, sub quibus artus
Conditur exanimos. Nam SPIRITUS ÆTHERE GAUDET,
Discipulumque pari sociat SUPER ASTRA Magistro.*

Sed quænam hæc Sedes Piorum, B. Pauline? In tertio Epigrammate respondentem audi :

*Sed quia tu non hac, qua Corpus, Sede teneris,
Qui meritis Superis Spiritus incolitas;
Sive Patrum Sinibus recubas, Dominive sub Ara
Conderis, aut sacro pasceres in Nemore :*

*QUALIBET IN REGIONE POLI situs; AUT PARADISI,
Clarè, SUB ÆTERNA PACE BEATUS agis.*

Hæc peccatorum bonus accipe vota rogantum,

Ut sis Paulini, Therasiæque memor.

Paulinum vides incertum, quo nomine Locum & Sedem Piorum appellet : hoc est, discernere non vult, Sanctus-ne Presbyter requiescat in Sinu Abrahamæ, an sub Cœlesti Ara Domini, an in sacro Nemore. Attamen firmissime credit, ejus Animam, sortitam Piorum Sedem, veritari & gaudere in Astris, ac lætari in Æthere & super Astra. Certus quoque est, ubicumque Clarus spiritu degat, & in quacumque Regione Cœli sive Paradisi nunc habitet, ipsam sub Æterna Pace Beatum vivere. Ac propterea se, ac Therasiam uxorem antea, tunc vero spiritalem Sororem suam, ejus apud Deum orationibus commendat : ex quo etiam illius apud Deam Sedem & Beatitudinem confirmat. Hæc S. Paulinus ad Sulpicium Severum.

Quid autem Severus ipse de hac re senserit, perquiramus. Est idem ille, quem S. Hieronymus, uti supra cap. v. vidimus, in Chelastarum album retulit. Attamen is, dum Martini celeberrimi Turonensis Episcopi, & Magistri sui, discessum e Mundo in Epist. III. ad Bassulam narrat, S. Virum vel in postremo anhelitu orantem nobis exhibet, atque oculis & manibus in Cælum semper intentum. Rogatus, ut corpusculum lateris mutatione relevaret, *Sinite, inquit, me, fratres, Cælum potius respicere quam Terram, ut suo jam itinere ITURUS AD DOMINUM SPIRITUS dirigatur.* Diabolum deinde prope adstare intuitus : *Quid heic, ait, adstas cruenta bestia? Nihil in me, fœneste, reperies. ABRAHE ME SINUS RECIPIT.* Ex his intelligis, Sinum ipsam Abrahamæ creditum ab antiquis in Cœlo ipso positum; quanquam, ut supra monui, ejusmodi vocabulo non Locum aliquem sed consortium Abrahami, patris omnium credentium, utique in Cœlo SS. Patres designasse videantur. Et ne quis de mente Sulpicii Severi, sive de Beatitudine Sancti Martini dubitet, en quid ipse Severus in Epist. II. ad Aurelium Diaconum scribat, ubi de S. Episcopo, pallo